



উপজেলা পরিক্রমা

নিয়ামতপুর

নিয়ামতপুর (নওগাঁ), ১৩ জানুয়ারী (সংবাদদাতা)।— নওগাঁ জেলার নিয়ামতপুর উপজেলার আয়তন ১৭৪ বর্গ মাইল। মোট জমির পরিমাণ ১ লাখ ১০ হাজার ৭শ' ২০ একর। আবাদী জমি ৮৯ হাজার ২শ' ২০ একর। অনাবাদী জমি ১ হাজার ৯শ' ৬ একর ও আবাদযোগ্য অনাবাদী জমির পরিমাণ ১ হাজার ৯শ' একর। ইউনিয়ন ৮টি। লোক সংখ্যা ১ লাখ ৫০ হাজার ৭শ' ৯৭ জন। পুরুষ ৭৫ হাজার ৩শ' ৭ জন, মহিলা ৭৪ হাজার ৯শ' ৯০ জন। প্রতি বর্গ মাইলে ৮শ' ৬২ জন লোক বাস করে। এ উপজেলা খাদ্যে স্বয়ংসম্পূর্ণ।

শিক্ষা ব্যবস্থা
এ উপজেলার শিক্ষা ব্যবস্থা অত্যন্ত দুর্বল। শিক্ষিতের হার পুরুষ মহিলা সমন্বয়ে ২১ দশমিক ১০ ভাগ। শিক্ষা প্রতিষ্ঠানগুলোর মধ্যে সরকারী প্রাথমিক বিদ্যালয়ের সংখ্যা ৭০টি। বেসরকারী প্রাথমিক বিদ্যালয়ের সংখ্যা ১৮টি। জুনিয়র হাইস্কুল ৬টি, হাইস্কুল ১৪টি তার মধ্যে ১টি বালিকা বিদ্যালয়। কলেজ উচ্চমাধ্যমিক মানের ২টি। মাদ্রাসা এবতেদায়ী-মঞ্জুরি প্রাপ্ত ১৮টি, দাখিল ৪টি, আলিম ২টি। শিক্ষা প্রতিষ্ঠানে ক্লাস রুম সংকট অর্থ ও আসবাবপত্র সংকট প্রকট।

যোগাযোগ ব্যবস্থা
নিয়ামতপুর উপজেলার কোন যোগাযোগ

ব্যবস্থা নেই। জেলা সদরের সাথে কদিন হল পর পর বাস-ট্রাক যাতায়াত করছিল। এতে যাতায়াত করা ভাগ্যের কথা। বিভাগীয় শহর রাজশাহীর সাথে যে যোগাযোগ রয়েছে তা জেলা শহরের মতোই। ইউনিয়নগুলোর সাথে উপজেলার কোন যোগাযোগ নেই। বরেন্দ্র ভূমির এ উপজেলায় রয়েছে লাল মাটি। বৃষ্টি হলে যেমন চলাচল করা যায় না তেমনি গ্রীষ্মের দিনে ধূলা বড়ের কারণে যাতায়াত অসম্ভব হয়ে পড়ে।

চিকিৎসা

উপজেলা স্বাস্থ্য কেন্দ্রটি জনসাধারণের উপকারে আসে না। প্রয়োজনীয় চিকিৎসা সামগ্রীর অভাব ও উপকরণের অভাবে ন্যূনতম জীবন রক্ষাকারী চিকিৎসা থেকে জনগণ বঞ্চিত হচ্ছে। ইউনিয়ন পরিকল্যাণ কেন্দ্রগুলোর অবস্থা আরও করুণ, কখনো ডাক্তার নেই, ওষুধ নেই। আজ পর্যন্ত জনগণ জানতে পারেনি যে তাদের জন্য সরকার চিকিৎসার ব্যবস্থা তাদের পাশেই করে রেখেছেন।

এ ছাড়াও উপজেলার হাট-বাজারগুলো সংস্কার একান্ত প্রয়োজন। এ উপজেলার টেলিযোগাযোগ ব্যবস্থার উন্নয়ন ও বিদ্যুতায়িতকরণ প্রয়োজন। এর অভাবে উন্নয়ন কর্মকাণ্ড মারাত্মকভাবে ব্যাহত হচ্ছে।